

LA DISPETTÔSA

Come l'è dispettôsa,
ma come l'è dispettôsa
la scorengia, gent,
com'a l'è dispettôsa...
Inscì insistent, inscì maliziôsa
quand la voeur vegnì foeura
che l'è minga el soo moment...
Fin che te sét in compagnia
le la rusa, la rusa, la te tormenta
che la te dà minga pas e tì
streng i ciapp, tegnela lì
mollela no, tegn el fias,
sbianca el mus
ch'el par on strasc...
– O dio la vâ, la vâ... No,
la tegni ammò...
La vâ, l'è lì e lì
per ciappâ la via del bus...
No, ghe la foo... –
O che dolor... O che fastidi,
che lotta per cascialla indree...

Poeu, finalment liber
de faa el to comod – oh, adess
dervi foeura, ghe doo fias –
ben, dove l'è? Cossa n'è staa?
In dove l'è andada?
– S'cioppa! – la gh'è pù!

Perduda in quai budell
la s'è desmentegada.

Vedii come l'è dispettôsa
la scorengia, gent,
inscì ostinada, inscì noiôsa
quand la voeur vegnì foeura
che l'è minga el sò moment?